

Innarluutilinnik sullissitut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalakkersuisut periusissiorlutillu iliuusissatut pilersaarusiornissaannut piumasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliuusissatullu pilersaarummi suliniutaasut anguniagassatut allassimasunut naapertuunnersut piffissap ingerlanerani nalilersuisarnissaq ilaassaaq. Periusissiatut iliuusissatullu pilersaarut saqqummiunneqassaaq kingusinnerpaamik UKA2021-mi.
(Inatsisartunut ilaasortaq Sofia Geisler, Inuit Ataqatigiit)

Akissuteqaat

(Ilinniartitaanermut, Kultureqarnermut Ilageeqarnermullu Naalakkersuisoq)

Siullermeerneqarnera

Naalakkersuisut siunnersuuteqartup siunnersuutaa pillugu qujaffigerusuppaat, isumaqatigaallu innarluutilinnik sullissitut atorfeqartut ilinniartitaanernik, ilinniaqqinnermik pikkorissarnernillu pisariaqartitsinerat iliuuseqarfigineqartariaqartoq.

Ukiuni kingullerni innarluutillit pillugit suliniutit ineriartungaatsiarsimapput, kingullermillu Inuit innarluutillit tapersorsorneqarnissaannut inatsisartut inatsisaat nr. 13, 12. juni 2019-imeersoq akuersissutigineqarpoq. Inuit innarluutillit tapersorsorneqarnissaat pillugu Inatsisartut inatsisaata piviusunnigortinneqarnissaa tunaartaralugu Isumaginninnermut, Ilaqutariinnermut Inatsisinillu Atuutsitsinermut Naalakkersuisoqarfik aamma Pinaveersaartitsinermut Isumaginninnermullu Aqutsisoqarfik kommuninut tamanut pikkorissaapput kommunini isumaginninnermi sulisut piginnaasaat nukittorsarniarlugit. Suliniut pingaartoq alla tassaavoq inuit innarluutillit illersuisuannik, november 2017-imi sulilersumik, toqqaaneq; taassumalu malitsigisaanik nuna tamakkerlugu innarluutilinnut sullissivik Pissassarfik 2018-imi Sisimiuni pilersinneqarpoq.

2019-imi ilinniartitaaneq pillugu ataatsimiititaliaq pilersinneqarpoq PI/SPS-imeersut, Isumaginninnermut Aqutsisoqarfimmeersut kommunineersullu aallartitat immikkut ilisimasallit inuttaralugit. Ilinniartitaaneq pillugu ataatsimiititaliamut suliakkiissummi ilaatinneqarpoq meeqqanut, inuusuttunut inersimasunullu tarnikkut timikkullu innarluutilinnut tulluussakkamik najugaq qimannagu perorsaasunnigorniarnermik pilersitsinissaq. Ilinniaqqinnerit pikkorissaqqinnerillu immikkoortuni immikkut ilisimasaqalernissaq anguniarlugu inerisarneqarput, taakkununga ilaallutik inunnik ineriartornermikkut pissusilersornermikkullu innarluuteqartunik sullissisunut immikkoortukkuutaartunik pikkorissaanerit.

UPA 2019/48-p oqallisiginerani aalajangerneqarpoq UKA 2021-mi inuit innarluutillit piginnaatitaaffii pillugit Naalagaaffiit Peqatigiit isumaqatigiissutaannik nunatta malinninnera pillugu nalunaarusiortoqassasoq. Nalunaarusiami siuaratigineqarsimasut

amigaatigineqartullu qulaajarneqassapput, nalunaarusiarlu tunngavigalugu Naalakkersuisut kingusinnerpaamik UPA 2022-mi nuna tamakkerlugu iliuuseqarnissamut pilersaarummik Inatsisartunut saqqummiussaqaassapput Naalagaaffiit Peqatigiit isumaqatigiissutaannik malinninnissaq tunaartaralugu.

Inunnik isumaginninnerup iluani innarluutillit immikkoortuupput pingaartinneqartut. Ilinniartitaanikkut piginnaanngorsaaqqinnikkullu pisariaqartitsinerit naalakkersuisoqarfiit akimorlugit suleqatigiinnikkut ataqatigiissaarneqartariaqarput “Isumaginninnikkut suliassaqaarfiup iluani ilinniartitaanikkut nukittorsaalluni suliniuteqarneq”-rup iluani. Ilinniartitaanikkut suliniuteqarneq Isumaginninnermut, Ilaqutariinnut Inatsisinillu Atuutsitsinnermut Naalakkersuisoqarfiup, Suliffeqarnermut Naalakkersuisoqarfiup Ilinniartitaanermut, Kultureqarnermut Ilageeqarnermullu Naalakkersuisoqarfiup akornanni 2018-imi pilersinneqarpoq.

Taamaattumik Naalakkersuisut isumaqatigaat innarluutilinnik sullissinnerup iluani sulisut ilinniartitaanikkut, ilinniaqqinnikkut pikkorissartitsinertigullu pisariaqartitaasa malinneqarnissaat pingaartuusoq, aammalu isumaginninnerup tungaatigut ulluunerani neqeroorutini aamma ulloq unnuarlu suliffeqarfinni suliniutinut ataqatigiissaarneqassasut.

Naalagaaffiit Peqatigiit isumaqatigiissutaannik nunatta malinninnera pillugu nalunaarusiassami, UKA 2021-mi saqqummiunneqartussami, innarluutilinnik sulissussisut ilinniartitaanikkut, ilinniaqqinnertigut pikkorissaanertigullu pisariaqartitsinerat ilanngullugu nalunaarusiarineqassaaq. Siuariaatit aamma amigaatit nuna tamakkerlugu iliuusissatut pilersaarummut ilanngunneqassapput, taannalu kingusinnerpaamik UPA 2022-mi saqqummiunneqassalluni. Inuit innarluutillit piginnaatitaaffii pillugit Naalagaaffiit Peqatigiit isumaqatigiissutaata malinneqarnissaa iliuusissatut pilersaarutip qulakkiissavaa.

Taamatut Naalakkersuisut oqaaseqarlutik siunnersuutip itigartinneqarnissaa inassutigaa.